



Alipaa Mbinguni Akiwa na Umbo

la Mwanadamu

Enyi watu wa Galilaya, mbona mmesimama mkitazama mbinguni? Huyu Yesu aliyechukuliwa kutoka kwenu kwenda juu mbinguni, atakuja jinsi iyo hiyo mlivyomwona akienda zake mbinguni.—**Matendo 1:11.**

Wakati wanafunzi walipokuwa bado wanatazama juu, sauti zilizungumza nao zilizosikika kama muziki mzuri sana. Wanafunzi waligeuka, na wakawaona malaika wawili wenye sura ya wanadamu, ambao waliongea nao wakisema: “Enyi watu wa Galilaya, mbona mmesimama mkitazama mbinguni? Huyu Yesu ... atakuja jinsi iyo hiyo mlivyomwona akienda zake mbinguni.”

Malaika hawa walikuwa kwenye kundi ambalo lilikuwa linasubiri katika wingu ling'aalo ili kumsindikiza Yesu kwenda katika makao Yake ya mbinguni. Malaika hawa ambao ni wenye hadhi kuu katika malaika wote, walikuwa ni wawili wale waliokuja kaburini wakati wa kufufuka kwake Kristo, na walikuwa pamoja Naye katika maisha Yake yote hapa duniani. Kwa shauku kubwa mbingu yote ilikuwa imesubiri mwisho ufike wa kuwapo Kwake katika ulimwengu ulioharibiwa na laana ya dhambi. Muda sasa ulikuwa umefika kwa wakazi wa mbinguni kumpokea Mfalme wao....

Kristo alikuwa amepaa mbinguni katika mwili wa kibinadamu. Wanafunzi waliona wingu likimpokea. Yesu yule yule aliyetembea na kuzungumza na kuomba pamoja nao; aliyekula pamoja nao, aliyekuwa pamoja nao katika mashua zao ziwani; na aliyekuwa siku ile amepanda mlima wa Mizeituni pamoja nao; Yesu yule yule sasa amekwenda kuketi katika kiti cha enzi pamoja na Baba Yake. Malaika waliwahakikishia kuwa, ni Yule Yule waliyemwona akienda zake mbinguni, ndiye atakayekuja tena jinsi iyo hiyo alivyokwenda mbinguni. Atakuja “na mawingu; na kila jicho litamwona”.... Hivyo wanafunzi wanapaswa wafurahi katika tumaini la Bwana wao kurudi.

Wanafunzi waliporudi Yerusalemu, watu waliwaangalia kwa kuwastaajabia. Baada ya mateso na kusulibishwa kwa Kristo, ilifikiriwa kwamba wataonekana wametelekezwa na kuaibika. Maadui wa wanafunzi walitumaini kuwaona wakionesha huzuni na kukata tamaa. Lakini badala ya hayo waliwaona wakichangamka na kufurahi kwa ushindi. Nyuso zao ziking'aa kwa furaha isiyokuwa ya duniani. Hawakuomboleza kwa sababu ya matumaini yaliyopotea, bali walikuwa wamejawa na sifa na shukrani kwa Mungu. Kwa shangwe walisimulia hadithi ya ajabu ya kufufuka na kupaa kwa Kristo, na ushuhuda wao ulipokelewa na wengi.

Wanafunzi hawakuwa na mashaka tena juu ya siku za usoni. Walifahamu kuwa Yesu yuko mbinguni, na ya kuwa huruma Zake ziko pamoja nao. Walijua kuwa walikuwa na rafiki kwenye kiti cha enzi cha Mungu, na walikuwa na shauku ya kupeleka maombi yao kwa Baba katika jina la Yesu.... Walinyoosha mkono wa imani juu hata juu zaidi, wakiwa na hoja kubwa, “Kristo Yesu ndiye aliyekufa; na zaidi ya hayo amefufuka katika wafu ... tena ndiye anayetuomba” (Warumi 8:34). Pentekoste iliwaletae furaha timilifu mbele ya Mfariji, kama Kristo alivyoahidi (Tumaini la Vizazi Vyote, sehemu ya 2, uk. 444 – 446).